

28.6.1977 nr. 31

+ Paul Schmid-Cavegn, Camischolas

(Corr.) La damaun dils 13 da zercladur 1977, per il di da s. Antoni, ha il zenn grond dalla baselgia parochiala da Sedrun annunziau cun tun lamentont la prematura mort da nies bien convischin Paul Schmid-Cavegn a Camischolas. Per resumar cuortamein — ed ord engrazieviladad — las statziuns da siu viadi terrester, stuein nus star in mument eri. — Aunc adina vala il proverbi: Oz en possa, damaun en fossa. Ins sa s'imaginar tgei frida che quei ei stau per sia cara consorta: ina aschidadir nunspetgada mort. Bein haveva nies car permiert stuiu serender ils 11 da matg el spital dalla Crusch a Cuera pervia da sia schliata vesida. Quella ha bein dau ils davos onns da semudergiar bravamein. Mo nus vulein far zun neginas reproschas alla divina providentscha, pertgei che sias vias ein buca las nossas. —

Paul Schmid ei naschiu a Camischolas ils 12 da fevrer 1914 e quei sco tierz affonet dils geniturs Paul Giusep ed Augustina, nata Riedi. Ina legria per geniturs. Mo sco mintga mortal ha era nies preziau permiert stuiu far enconuschientscha cun beinenqual adversitat dalla veta. Ed aschia ha quei affon gia piars cun quater onns sia mumma dalla grippa dils anno 1918. El resta anavos cun ses fargliuns sco paupers orfans. Siu bab, il Paul vegher, sco el vegneva numnaus, fageva il pur, e denteren era el era occupaus sin la via cantunala. Mo da lezzas uras deva ei negina pensiun e las entradas fuvan magras. Ils anno 1923 anfla siu bab puspei sia secunda consorta. Quella remplazza la sperdita da sia cara mumma. Era quella ei stada ina buna mumma per quels orfans. Mo lein esser sincers aschi bunas sco quellas san esser ed ein, il medem eisi mai.

Paul Schmid ei staus rentaus sia veta entira alla clamada purila e quei cun tgiert ed olma. Cun bials tiers tut tarlischava el dalla legria. Ed el haveva uorden cun el e cun siu fatg. Buca che il Pauli, sco el vegneva numnaus, fuss staus in um da grondas caneras, mo el saveva meinsvart sescaldar, cura ch'el veseva co ei mava en ed ord vischernaunca cun ina caussa u l'autra. Cun curonta onns ha el tuttina ughegiau dad ir entochen a Rueras tier la giuvna Marionna Cavegn, che fageva la spindrera e fa ei aunc oz. E lura ein quels dus passai agl altar dil Segner ils 11 da november 1954. La Marionna ei stada ina buna e sparngusa consorta, era derivonta d'ina

famiglia puramein purila. Ei fuvan enta parvis. Famiglia han ei giu negina. Els han luvaru e barhau ensemes ed eran era perschuadi dalla devisa: ura e lavura, Dieus tei gida lura.

Tier sia sepultura ha in pievelun, sco darar viu, priu cumiau da nies preziau vischin. Bein ina enzenna che el era preziaus e stimaus da tuts. Bien Pauli, Ti has ussa finiu il cuors terrester e fatg il viadi che nus havein era aunc da far in di. Ti sas ussa guder en tschiel la pagaglia che Ti has meritau per tut Tiu far e demanar. Perquei vulessen nus confortar la combrigida consorta e fargliuns, pertgei ei dat in di in seveser. Il Segner detti ad el il ruauas perpeten ed a tuts nos cars defuncts. RIP. G.F.

Purs, dei gie adatg!

Suflafein cun motors da benzin/ sco caschunaders d'incendis

(Comm.) En sesez duess mintga pur esser orientaus davart il prighel dil suflafein cun motor a benzin. Che quei ei denton buca il cass demuossan dus incendis enteifer in'jamna el Grischun. Quei ei vegniu caschunau claramein da tals aggregats. Ils baghetgs d'economia ein vegni destrui totalmein ed ina casa per part. Mo il donn dils baghetgs monta a frs. 700'000. Gronda ei era la valeta dil mobigliar destruiu, dallas maschinas sco era dil pavel barschau che ei vegnius raccoltaus cun dabia stentas. Suenter ils incendis ha quel denton stuiu vegnir allontanau — malgrad ch'el veva negina valetar pli — duront liung temps dils pompiers.

Tras installar endretg il suflafein — tenor las prescripziuns dalla polizia da fiug — e cun ver bien quitaui dil suflafein e dils motors a benzin duess ei esser pusseiyel da saver evitare tals donns.

Radio

Mesjamna, 29 da zercladur

19.30—19.40 UKW2

Novitads

Glevgia, 30 da zercladur

19.30—19.40 UKW2

Novitads

Venderdis, 1. da fenadur

19.30—19.40 UKW2

Novitads